

Siumoortumik nalunaarsuineq, nammineerluni nalunaarsuineq aamma akileraarutit isumannaarneqarnerat pillugit Namminersorlutik Oqartussat nalunaarutaat

Akileraaruserinermik ingerlatsineq pillugu Inatsisartut inatsisaanni, § 13, imm. 7 aamma 8, § 14, imm. 1, § 15, imm. 2, § 17, imm. 1, § 28, § 42, imm. 2, § 45, imm. 3, § 56 aamma § 83, tak. Akileraaruserinermik ingerlatsineq pillugu Inatsisartut inatsisaat pillugu Namminersorlutik Oqartussat nalunaarutaat nr. 11, 3. november 2021-meersoq, Inatsisartut inatsisaatigut nr. 74, 18. november 2025-meersukkut kingusinnerusukkut allanngortinneqartumi, kiisalu § 83, imm. 2, tak. Namminersorlutik Oqartussat nalunaarutaat nr. 62, 24, oktober 2025-meersoq, naapertorlugit aalajangersarneqarput:

Kapitali 1

Siumoortumik nalunaarsuineq, § 15 naapertorlugu utertitsinerit aamma nammineerluni nalunaarsuineq

Siumoortumik nalunaarsuineq nalinginnaasoq

§ 1. Immersugassat ilitsersuutillu siumoortumik nalunaarsuineri atugassat akileraaruseriffiup suliarissavai.

§ 2. Immersukkat paasissutissaajunnartullu allat siumoortumik nalunaarsuineri nalinginnaasumi naatsorsuutigineqassagunik ukioq aningaasarsiorfiusoq sioqqullugu kingusinnerpaamik 15. novemberimi akileraaruseriffimmi tiguneqarsimassapput. Immersukkat paasissutissaajunnartullu allat akileraaruseriffimmut digitaliusumik nassiunneqarsinnaapput.

Imm. 2. Akileraaruseriffiup piffissaliusseq imm. 1-imi pineqartoq naqitatigut aamma elektroniskiusumik tusagassiuutitigut nuna tamakkerlugu saqqummersartutigut kingusinnerpaamik oktoberip qiteqqunnerani tamanut nalunaarutigissavaa.

§ 3. Akileraartussaataitasut akileraaruserinermik ingerlatsineq pillugu Inatsisartut inatsisaanni § 13, imm. 6-imi pineqartut aningaasarsiornikkut atugassarissangasatik pillugit, Kalaallit Nunaannut akileraartussaataitalernerminniit ullut 14-it qaangiutsinnagit nassuiaateqassapput.

Skattkortit aamma akileraarutissat allagartaat

§ 4. Akileraaruseriffiup skattekortit aamma akileraarutissat allagartaat suliarissavai akileraartussaataitaasunullu nassutissallugit, taamaattorli tak. imm. 2 aamma 3.

Imm. 2. Akileraarutininik A-nik unerartitsinissamik püssaasup (unerartitsisussaataitaasup) akileraartussaataitaasumik sulisoqartup, ukiup aningaasarsiorfiussap aggersup ingerlanerani akileraartussaataitaasumik akissarsitsinissani naatsorsuutiguniuk skattekortia novemberip 15-ia nallertinnagu piniarsinnaavaa.

Imm. 3. Akileraaruseriffiup skattekortit unerartitsisussaataitaasumut tunniussimaguniuk tamanna akileraartussaataitaasumut nalunaarutigissavaa.

§ 5. Tamakkiisumik akileraartussaataitaasoq inaarutaasumik naatsorsuineq malillugu akileraarutit sinnerinik akiliissappat, akileraarutit sinnerisa ilaat, tapiliussaq imm. 4 naapertorlugu ilanngullugu 23.000 kr.-init amerlanerunngitsut akileraaruseriffiup erseqqinnerusumik aalajangiinera malillugu ukiup tullissaani akiliutissat ilassaattut nuunneqassapput, taakkulu matussuserniarlugit ukiumi tassani akileraarutininut A-nut B-nulluunniit akiligassiissutininut ilanngunneqassallutik. Ukiumi akileraarutit sinnerisa nuunneqarfianni akileraarutininut akilersinneqartut, akileraarutit sinnerisa nuunneqartut siulliullugit matussusernissaannut atugassatut isigineqassapput.

Imm. 2. Imm. 1 naapertorlugu akiligassiineq püssaaq akileraartussaataitaasup ilanngaatisaasa naatsorsueriaaseq imaattoq malillugu ikilisinnerisigut: Akileraartussaataitaasup ilanngaatisai ima ilanngarlugit (akileraarutit sinneri nuunneqartut procentimik akileraarusiisummik agguarlugit 100-millu gangerlugit). Skattekortimi ilanngaatisat naatsorsorneqartut minusiuppata 0-inngortinneqassapput.

Imm. 3. Aningaasat imm. 1-imi pineqartut sinnerigunnagaat akileraaruserinermik ingerlatsineq pillugu Inatsisartut inatsisaanni § 24, imm. 3-mi 4-milu maleruagassat naapertorlugit akiligassanngussapput. Tamanna aamma atuuppoq akileraarutit sinneri nuunneqartut ukiumi tulliuttumi akileraarutaagallartussanut ilanngunneqarsinnaanissaat naatsorsuutigineqarsinnaanngippat.

Imm. 4. Akileraarutit sinneri piffissami inaarutaasumik naatsorsuiffiup suliarineqarnerani 6 procentimik tapiliussamik ilallugit naatsorsorneqarsimanerattut ilanngunneqassapput. Akileraarutit sinneri imm. 1 naapertorlugu nuunneqartut ernialersorneqassanngillat.

Imm. 5. Aningaasat imm. 2-mi 4-milu pineqartut koruunimut ilivitsumut qaninnermut ammut akunnaallineqassapput.

§ 6. Aningaasat 23.000 kr.-it, tak. § 5, imm. 1, akileraarutit sinnerininut matussutissatut tamakkiisumik atorineqanngippata ukiumi aningaasarsiorfiusuni siusinnerusuni akileraarutininut akiitsut tapiliussat ilanngullugit akiligassanngorsimasut, akileraaruseriffiup erseqqinnerusumik aalajangiinera malillugu aningaasat sinnerininut nuunneqarsinnaapput.

Imm. 2. Akileraarutininut akiitsut akiligassanngorsimasut tassaapput aningaasarsianit akileraarutit, akitsuutit, tapit, akiliisitsissutit erniallu, akileraaruseriffimmit ingerlanneqartut pillugit akiitsut. Akiitsut taagorneqartut pisoqaanerit siulliullugit, taavalu matussusiinissamik tulleriarineq taaneqartoq malillugu matussuserneqartassapput. Akiitsut ilanngunneqartut akileraarutit sinnerininut ilanngunneqarsimasunit kingulliullugit matussuserneqassapput, kisiannili ukiumi aningaasarsiorfiusumi pineqartumi akileraarutininut A-nit siulliullugit.

Imm. 3. Akiitsut aningaasartaat ukiumi pineqartumi 20. november naatsorsorneqarsimanerattut ilanngunneqassapput. Tassunga ilanngunneqassaaq akiitsut tapiat 6 procentiusoq landskarsip pisassaa,

kisianni tapit, akiliisitsissutit erniallu ilanngunnagit. Aningaasat koruunimut ilivitsumut qaninnermut ammut akunnaallineqassapput.

Imm. 4. Akileraarutinut akiitsut imm. 1 naapertorlugu nuunneqartut ernialersorneqassanngillat.

Imm. 5. Akileraartussaataitaasup siumoortumik nalunaarsuutaata kingusinnerusukkut allangortinneqarnerata kingunerisaanik akiitsut ilanngunneqartut skattekortikkut unerartinneqarsinnaajunnaarpata akiitsut utertinneqassapput.

Imm. 6. Akiitsut ilanngunneqartut ukiumi aningaasarsiorfusumi akileraarutinut A-nut akiliutaagallartunit matussuserneqanngippata akiitsut utertinneqassapput, ernialersuinerlu ukiumi aningaasarsiorfusumi 1. januar aallarnerfigalugu kingumoortumik ingerlateqqinneqalissalluni, aammalu akiitsut tassuuna utertinneqartut tapiat 6 procentiusoq atortussaajunnaarsinneqassaaq.

§ 7. Akileraaruseriffiup aningaasat § 5, imm. 1, imaluunniit § 6, imm. 1 naapertorlugit nuunneqarnissaat pinngitsoortissinnaavaa imaluunniit aningaasat ikinnerusut nuunneqarnissaat aalajangersinnaavaa, nuussineq akileraartussaataitaasup akileraartussaataitaasullu inoqutaasa naammaannartumik angerlarsimaffeqarnissamut naammaannartumillu inuuniarnissamut akissaarunnissaanik kinguneqassasoq akileraaruseriffiup nalilerpagu.

§ 8. Akileraartussaataitaasoq tamakkiisumik akileraartussaajunnaarpat akileraarutit sinneri § 5, imm. 1 naapertorlugu, aammalu akileraarutinut akiitsut § 6, imm. 1 naapertorlugu nuunneqarsimasut 3-nut agguarlugit naafferartumik akiligassanngussapput, siullermik akilerneqartussanngussallutik tamakkiisumik akileraartussaajunnaarfiup kingorna qaammatip qaninnerup aallaqqaataani, taassumalu kingorna qaammatit tulluittut marluk aallaqqaataanni, qaammatinilu akiliiffissani tamani piffissaagallartillugu akiliiffissaq kingulleq tassaassalluni qaammatit ulluisa 20-at.

Imm. 2. Piffissaagallartillugu akiliiffissaq sapaataappat nalliuttuuppalluunniit imaluunniit arfininngorneruppat piffissaliusseq ulluinnarmut tulluittumut sivitsorneqassaaq.

§ 9. Aningaasat 23.000 kr.-it, tak. § 5, imm. 1, tamakkiisumik atorneqanngippata aningaasarsiat B-t sapinngisamik amerlanerpaat skattekortimi ilanngaatisat sinnerisa ilaannit ilanngaatigineqassapput, taamaaliornikkut skattekortit ilanngaatisanik appaaffigalugu imaluunniit ilanngaatitaqanngivissumik suliaralugu.

Imm. 2. Akileraarutit B-t naatsorsorneqarneranni aningaasarsiat B-t sinneruttut koruuninut 100-mik agguarneqarsinnaasunut qaninnernut ammut akunnaallineqassapput.

Imm. 3. Akileraarutit B-t 100 kr.-init amerlaneruppata akileraarutissat allagartaasigut akiligassiissutigineqassapput.

§ 15 naapertorlugu utertitsinerit

§ 10. Aningaasarsianit akileraarutinut akiliutaavallaarsimasut utertinneqarnissaanik qinnuteqaatit akileraaruseriffimmut allakkatigut nassiunneqassapput, tak. akileraaruserinermik ingerlatsineq pillugu Inatsisartut inatsisaanni § 15, imm. 1.

Imm. 2. Utertitsinissamik qinnuteqaat aatsaat akuerineqarsinnaavoq akileraartussaataitaasup akileraarutaagallartunut akiliivallaarsimanini nammineerluni nalunaarsuutikkut, naatsorsuutitigut,

akissarsiat allagartaasigut allatigulluunniit takussutissaqartippagu, taamaalillunilu akileraarusiinerup naammassineqarnerani akileraarutit sippuutaannik pisassaqaartussatut ilimagineqarsinnaappat.

Nalikilliliinermi immersugassaq

§ 11. Akileraartussaataitaasut ingerlatsinermi naatsorsuutinik akileraaruseriffimmut nassiussisussaangitsut, tak. akileraaruserinermik ingerlatsineq pillugu Inatsisartut inatsisaanni § 17, imm. 3, aamma § 18, imm. 1, kisiannili akileraarutitigut nalikilliliisinnaasut nalikilliliinermi immersugassaq akileraaruseriffimmit suliarineqartoq atussavaat.

Imm. 2. Imm. 1 naapertorlugu pisussaaneq akileraaruseriffiup qinnuteqartoqarneratigut malitsinngitsoorsinnaavaa.

Kapitali 2

Akileraarutininik isumannaarineq

Kommunimut akileraarut

§ 12. Akileraarutit akilerneqartut ilaannit kommunimut akileraarut tassaavoq procenti aningaasarsianut inummut ilanngaammik ilanngarneqarsimasunut akileraarusiissutaasoq, kommunip akileraarfusup qaammatisiutit malillugit ukiumut aalajangersarsimasaa.

§ 13. Akileraaruseriffik, kommunit inuit akileraarutaasa ilaannit pisassaasa isumannaarneqartarnerat pillugu kommuninut isumaqatigiissuteqarsinnaavoq. Akileraaruseriffiup tassunga ilanngullugu isumaqatigiissutigisinnaavaa inuit akileraarutaannik isumannaarisarneq ukiup ingerlanera tamaat atsikkutigiiissumik akiliisarnikkut pisarsinnaasoq, kommuninullu akileraarutininik akilerneqartunut tunngatillugu nikingassutaasut, matumani ilanngullugit akileraarusiinerup aammalu akileraarutissanik angissusiliinernik kukkuneruinerit kingunerisaannik nikingassutaasut ukiumi tulliuuttumi isumannaarinissanut ilanngunneqassasut.

Nunamut tamarmut akileraarut aamma kommuninut ataatsimut akileraarut

§ 14. Akileraarutit akilerneqartut ilaannit nuna tamakkerlugu akileraarut aamma kommuninut ataatsimut akileraarut ukiumi aningaasarsiorfusumi pineqartumi nuna tamakkerlugu akileraarusiissutigineqartut, kommuninut ataatsimut akileraarusiissutigineqartut aamma kommunimut akileraarusiissutigineqartut annertussusii tunngavigalugit naatsorsorneqassapput.

Selskabit akileraarutaat

§ 15. Akileraaruseriffiup selskabit akileraarutaasa ilaat kommunip akileraarfusup pisassai, ukiup aningaasarsiorfusup qaangiunnerata kingorna kingusinnerpaamik qaammatit 13-it qaangiunneranni komunimut akilertassavai.

Imm. 2. Selskabit akileraarutaasa ilaat kommunip akileraarfusup pisassai imm. 1 naapertorlugu akilerneqartut ukiumi aningaasarsiorfusumi pineqartumi nuna tamakkerlugu akileraarusiissutigineqartut, kommuninut ataatsimut akileraarusiissutigineqartut aamma innuttaasut amerlassusiat malillugu kommunimut akileraarusiissutigineqartut annertussusii tunngavigalugit naatsorsorneqassapput, tak. akileraaruserinermik ingerlatsineq pillugu Inatsisartut inatsisaanni § 40, imm. 7.

Iluanaarutisianit akileraarutit

§ 16. Akileraaruseriffiup iluanaarutisianit akileraarutit piffissami qaangiuttumi akilerneqartut ilaat kommunip akileraarfusup pisassai minnerpaamik ukiumut marloriarluni kommunimut akilerallartassavai.

Imm. 2. Akileraaruseriffiup iluanaarutisianit akileraarutit qaammatini 12-ni qaangiuttuni akilerneqartut ilaat kommunit akileraarfusut pisassaat kingusinnerpaamik januarip naanerani inaarutaasumik akilertassavai.

Imm. 3. Iluanaarutisianit akileraarutit ilaat kommuninut akileraarfusunut imm. 1 naapertorlugu akilerneqartut ukiup siuliani nuna tamakkerlugu akileraarusiissutigineqartut, kommuninut ataatsimut akileraarusiissutigineqartut aamma kommunimut akileraarusiissutigineqartut annertussusii tunngavigalugit naatsorsorneqassapput.

Akileraarutit annaasat agguanneqartarnerat

§ 17. Akileraartussaataasut unerartitsisussaataasullu akileraarutininik akiliinnginnerisigut annaasat kommunit Namminersorlutillu Oqartussat nammatassaraat.

Imm. 2. Annaasat ilaat kommunit nammatassaataatsimoortumik tapiissutit pillugit ukiumoortumik isumaqatigiinniarnerni aalajangersarneqartassapput ataatsimoortumillu tapiissutinit ilanngaatigineqartassallutik.

Ernialesuineramik unitsitsineq

§ 18. Akileraarutininut akiitsunik ernialersuineramik unitsitsinissaq nalinginnaasumik aalajangerneqarsinnaangilaq

- 1) akiligassaqartuusup aningaasarsiorneranut tunngasut erseqqissumik ilisimaneqanngippata, imaluunniit
- 2) akiligassaqartuusup akiitsuni naafferarlugit akilersorsinnaasimagaluarlugit taamaalorsimannngippat.

Imm. 2. Akileraarutininut akiitsunik ernialersuineq nanginneqassaaq akiligassaqartuusup aningaasarsiornera ima periarfissiippat akiligassaqartuusooq piffissap sivisunerpaamik ukiunik pingasunik sivisussuseqartup iluani akiitsuminik tamarmiusunik akilersuisinnaalluni.

Kapitali 3

Pineqaatissiissutit aamma atortuulerfia

§ 19. Kinaluunniit piaaraluni mianersuaalliorujussuarluniluunniit § 3-mik unioqqutitsisoq akiliisinneqarsinnaavoq.

Imm. 2. Inatsisitigut pisinnaatitaasoq tamatumunnga ilanngullugit ingerlatseqatigiiffik, kattuffik, pisortat il.il. imm. 1-imik unioqutitsisuuppata, Kalaallit Nunaanni pinerluttulerinermi inatsit Kapitali 5-imi maleruagassat naapertorlugit, pinerluttulerinermi inatsisitigut akisussaatinneqarsinnaavoq.

Imm. 3. Akiliisitsinerit Nunatta Karsianut tutsinneqassapput.

§ 20. Nalunaarut 1. April 2026-mi atuutilissaaq.

Imm. 2. Ilutigitillugu atorunnaarsinneqarpoq siumoortumik nalunaarsuineq, nammineerluni nalunaarsuineq aamma Namminersorlutik Oqartussat akileraarutit isumannaarneqarnerat pillugit nalunaarutaat nr. 7, 30. marts 2012-imeersoq.

Namminersorlutik Oqartussat, ulloq 13. Marts 2026

Múte B. Egede (atsior.)

Aningaasaqarnermut Akileraartarnermullu Naalackersuisoq

/Nikolai Sten Christensen (atsior.)

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalackersuisut